

四庫全書

子部

欽定四庫全書

唐開元占經卷七十六

唐 瞿曇悉達 撰

雜星占

星晝見一

甘氏曰星與日並出名曰女嫁星與日爭光武且弱文  
且強女子為主而昌在邑為喪野為兵 辨終條曰星  
晝見虹不藏臣人生海失常主淫於色酒湏沉慎失職

出遊遨 甘氏曰明星奪日光天下有立王 呂氏春

秋曰武王勝殷將二虜而問焉曰若國有妖乎二虜對

曰國有妖星晝見 甘氏曰星無故常晝見者名女王

不出三年大水浩洋若有女王立 京氏曰晝星見人

臣有奸心上不明臣下縱橫修撰 孝經雌雄圖曰一

星晝見者君子失國亡道入邊為虜 魏氏圖曰一星

晝見者君子失國亡世當敗必死 雌雄圖曰二星晝

見者皇后失勢以刑死一曰公亡刑則失度為羗狄所

賊 又曰有白衣問詐在宮中 魏氏圖曰三星晝見

者君有亡邦憂羗人入界欲為天子一曰臣有憂其世  
絕 又曰參與辰俱見天下有兵二邦相攻血流 孝

經內記曰三星在日上下者外人欲殺奸在後宮 又

曰三星在日左右者臣欲殺君與將軍共為一心 雌

雄圖曰三星晝見者臣有大憂公卿為夷狄賊所害

又曰四星及五星晝見者王侯為外界人所殺一曰君  
弟有死憂 內記曰四星在日上下者王侯欲伐國政

之憂 魏氏圖曰北斗晝見者君死亡絕後嗣也

恒星不見二

楊泉物理論曰凡無名之星一見一不見唯二十八宿

度數有常故曰恒星 左氏傳曰魯莊公七年四月辛

卯夜恒星不見

恒常也謂常見之星也辛卯四月五日  
夜月光尚微蓋時無雲日光不以昏沒

也 夜中星隕如雨

如而也夜半乃有雲星落而且如  
雨其數多也皆記異也日光不匿

恒星不見云夜  
中者以水漏也

傳曰恒星不見夜明也星隕如雨與

雨偕也

偕俱也

穀梁傳曰常星者在位人君之類不見

者無君之象也 公羊傳曰恒星布列四方助天為光

明諸侯之象不見者象諸侯之背叛不佐王者奉順法度

春秋緯曰恒星不見言周制絕滅衆耀隕亂 運斗

樞曰蒼帝行失則列星滅 雒罪級曰恒星不見主嚴

法度消 助佐期曰列星不見精無耀天子失政諸侯

橫暴 董仲舒曰常星二十八舍人君之象也衆星者

萬民之類也列宿不見象諸侯微也 許慎曰衆星者

庶民之象也與列宿俱亡中國微滅也 鄭玄曰恒星

謂列舍持天子之正也不見者諸侯乘天子禮義法度  
又夜明象諸侯概然將强大也 河圖舍占篇曰將失  
政不法則星亡 尚書中候准讖哲曰煌煌之滅闕失  
權流頓斬恒星滅

星鬪占三

呂氏春秋曰至亂之化有星鬪 班固天文志曰辰星  
與他星相遇而鬪天下大亂

衆星搖動四

洪範天文星變占曰漢武元光中天星盡搖上問侯星對曰星搖民勞也後征伐四夷百姓勞於兵革也

星隕占五

京房易傳曰星者陰精也五行之形其體在下精耀在天百官之本各因其原星飛反行萬民不安太星隕下陽失其位災害之萌也其救也人君當悔過反政克己責躬省徭役安國封侯以寧民為先則宿正矣 洪範傳曰星者在位人君之類也隕者衆其隕墜失其所也

夜中然後隕者言不得終其性命中道而敗 或曰象  
其叛也夜中然後反者言當以中和之道反之也天變  
所以語人也防惡遠非隕卑有微將以安之也 班固

天文志曰夜中星隕者為中國也 鹽鐵論曰常星猶

公卿也衆星猶萬民也列星正則衆星齊常星亂則衆

星墜 感精符曰天下無法度莫能相治患禍並見四

夷為邪則星隕皆失其正異姓起行貪奢強國并兼民  
流彼邦此王者失執諸侯起霸之異 董仲舒曰星隕

者君主太盛臣下墜落之象也省刑罪無加賢臣以救之  
洛書曰衆星隕不言侯伯伐王 天鏡曰國易主  
則星墜國有大凶其主亡則衆星墜 董仲舒曰衆星  
墜民失其所也 荊州占曰星墜當其下有戰場天下  
亂期三年 推度災曰奔星之所墜其下有兵列宿之  
所墜滅家邦衆星之所墜萬民亡 運期授曰黃帝亡  
也黃星墜 文曜鉤曰鎮星墜海水溢 考異郵曰黃  
星騁海水躍 運斗樞曰黃星墜海水傾 淮南子曰

卷七十六  
奔星墜而渤海決

許慎曰奔星流星也

天官書曰宋襄公時隕

如雨

杜預春秋曰如而也星落而且雨也

天子徵諸侯力政五伯代興更

為民主自是之後眾暴寡大并小並為戰國 京房曰

星以春三月墜歲凶不登其二月大殃秋三月墜兵起

八月大殃 左傳曰星隕如雨與雨偕也 洪範曰此

象天子微弱民將去土諸侯起霸終於徵滅之應也

潛潭巴曰星隕如雨厥民叛下有專討歸眾 京房曰

人君不仁傷胎孕殺無辜則歲星失度星隕如雨不收

則弟殺兄臣誅君其救也內慈仁敬讓外慮恩施惠無  
犯四時歲星承度隕星上覆列宿 又曰君不任賢厥  
妖天雨星也 漢書曰成帝永始二年二月癸未夜過  
中星隕如雨長一二丈繹繹未至地滅至雞鳴止谷永  
對曰日月星辰燭臨下土其有食隕之異即遐邇幽隱  
靡不咸覩星附麗於天猶庶民附麗王者君失道也網  
紀廢頽下將畔去故星畔天而隕以見其象春秋記異  
星隕最大自魯莊公己未于今再為見臣聞三代所以

喪亡者繇婦人羣小沉湎于酒書云乃用其婦人之言  
四方之多罪逋逃是信是使詩云赫赫宗周褒姒滅之  
顛覆厥德荒湛于酒及秦所以二世而亡者養生太奢  
奉終太厚方今國家兼而有之社稷宗廟之大憂也

天鏡曰星墜為石天下兵起流血萬里 又曰國有兵

凶則星墜為鳥獸 京房曰天下將亡則星墜為飛蟲

又曰歲大饑大殃則星墜為粟豆 又曰天下大兵則

星墜為金鐵 天鏡曰天下有水則星墜為水 又曰

國有大饑有兵流血則星墜為土 又曰國主亡有兵  
則星墜為草木 又曰兵起國主亡則星墜為沙 京  
房曰星墜為人而言者善惡如其言 又曰國有大喪  
則星墜為龍 河圖曰將失政不法石墜星亡 援神  
契曰星墜石墜大人憂 京房曰星墜化為石臣下倍  
主主妄行 又曰兵將作妖星隕為石 天官書曰星  
墜地則石也 河濟之間時有墜星 左傳曰僖十六  
年春隕石于宋五隕星也周內史叔興聘於宋宋襄公

問曰是何祥也吉凶焉在對曰今茲魯多大喪明年齊有亂君將得諸侯而不終退而告人曰君夫問是陰陽之事非吉凶所生也吉凶由人吾不敢逆君故也 洪

範占曰明年齊桓公卒五子爭國宋公伐齊行霸後六年為楚所敗不終之應也 抱朴子外圖曰隕星者其精耀非隕其質也隕石于宋五非星也俗人視天上惟有日月與星計言從天上墮惟當是此三物而日月常在故謂墮者必是星耳天或雨血雨魚雨灰雨草木雨

兵雨石雨穀如此是天降怪異無所不有春秋時隕石  
所謂雨石者也何必星乎或四方高山之石飛行為怪  
墜之於地耳其妖大甚不可悉載 史記秦始皇三十  
六年有隕皇下東郡至地為石黔首或刻其石云始皇  
死而地分始皇問之遣御史遂問莫服盡取石旁舍人誅  
之燔其石 洪範占曰是歲始皇崩三年而秦滅亡

趙書曰石勒時有星隕魏郡鄴縣東北六十里初有黑  
黃雲如幕長數十疋交錯音聲如雷墜地熱氣如火塵

起連天時左右有私鋤者皆震疊塵止經視之土猶帶  
熱求覓見有一石方一尺青色而輕擊之聲如磬未幾  
石勒死虎殺其子而自立

唐開元占經卷七十六

欽定四庫全書

唐開元占經卷七十七

唐 瞿曇悉達 撰

客星占一

瑞星

宋均曰景星大而中空 孟康曰景星者有赤方氣與  
青方氣相連赤方氣中有兩黃星青方中一黃星凡三  
星合為景也

案蜀志曰後主景耀元年史官言  
星見於是大赦改年為景耀也

天官

書曰天晴而見景星景星者德星也其狀無常常出有道之國 瑞應圖曰景星者大星也狀如半月生於晦

朔助月為明王者不私人則見又曰德及幽隱則出又

曰景星者星之精也光從月出出於西方王者不私人

以官使賢者在位則景星出見佐月為明 班固天文

志曰天晴而見景星

占六十日  
晴精明七

河圖曰黃帝治景星

見於北斗也 尚書中候握河紀曰堯即位去年景星

出翼鳳凰止庭

鄭玄注曰景大也  
明也翼朱鳥宿也

又曰帝執德恭聰

明密微思心清靜在庭從宜仁推度符移序精和天地  
休通五行相化景星出攝提 含文嘉曰王者序長幼

各得其正則房心有德星應之 合誠圖曰天子精耀

心墳務德則景星窺

宋均曰墳盛也窺猶見也

禮稽命微曰王者

制禮作樂得天心則景星見 感精符曰王者德上感

皇天則景星見 孔演圖曰天子以賢舉則景星效於

天 春秋緯曰周圖變書云赤雀所銜蜀下授文王於

豐殿之

闕

天子精耀招神任理

闕

有嚮心順務德則

景星見鸞鳳下 元命包曰仁義茂盛賢俊彰明神符

感出景星守參 感精符曰堯時氣充盛上感皇天故

景星見 孝經內事曰天子行孝德則景星出 援神

契曰王者德至天則景星見 白虎通曰景星者大星

也月或不見景星恒見可以夜作有補於人 帝王世

紀曰舜時景星見於房 坤靈圖曰至德之萌黃景索

於北斗必以戊巳日其光無芒行久無武動軍莫之敢

拒 含文嘉曰宮室之禮得則虛危有德星應 又曰

居喪以禮則德星應在虛危 稽命徵曰禮得其宜則

虛危有德星見 含文嘉曰宮室之禮得營室有德星

應 又曰居喪以禮則德星應與鬼 又曰天子穆穆

諸侯皇皇則少微有德星 又曰殯喪之禮以其時則

三階平正有德星出入其間 又曰天子袷綈巡狩有

度考功責實外內之制各得其宜四方之事無蓄滯上

下交通則山澤出靈龜寶石麒麟至苑囿六畜繁多天

苑有德星應 案中顓泰書符堅建元六年四月天苑有大星色甚白占者以為太平之祥乃立望

氣臺於宮左冬十一  
月平燕國擒慕容暉

含文嘉曰天子行饗射飲酒之

禮得其宜則曰大德天苑左右角皆有大德星應

海中占曰德星守建星君臣俱明天下更平五穀更興

宋均曰含譽瑞星光耀侶彗 援神契曰喜則含譽

射

客星名狀二

黃帝曰客星者周伯老子王蓬絮國皇溫星凡五星皆  
客星也行諸列舍十二國分野各在其所臨之邦所守

之宿以占吉凶 又曰客星大而色黃煌煌然名曰周伯見其國兵起若有喪天下大饑人民流亡去其鄉

又曰客星明大白淳然名曰老子所出之國為饑為凶為善為惡為喜為怒常出見則兵大起人主有憂王者以赦除咎則災消 又曰客星狀如粉絮拂拂然名曰王蓬絮見則其國兵起若有喪白衣會其邦飢亡 荊州

占曰王蓬絮星色青而熒熒然所見之國風雨不如節燥旱物不生五穀不登多蝗虫 黃帝曰客星出而大其色

黃白望之上有芒角名曰國皇見則兵大起國多變若有水饑人主惡之人多疾 又曰客星色白而大狀如風動搖名曰溫星常出四隅出東南天下有兵將軍出於野出東北有千里暴兵出西北亦如之出西南其國兵喪並起若大水人饑 石氏曰溫星出東南為大將軍服屈不能發者出於東北暴骸三千里出西亦然 黃帝曰客星見其分若畱止即以其色占吉凶星大事大星小事小星色黃得地色白有喪色青有憂色黑有死

色赤有兵各以五色占之皆不出三年 巫咸曰客星  
入列宿中外官者各以其所部舍官名為其事所之者  
為其謀其下之國皆受其禍以所守之舍為其期以五  
氣相賊者為其使

客星犯月三

河圖曰日月與大星晝並見是謂爭明大國弱小國強  
河圖曰大客星流入月中無光當有與君俱并兵死  
者 又曰客星八月中有破觸月臣弑主有內亂 洛

書曰客星八月中有破軍 又曰大星八月中臣弑主  
又曰大星八月月無光其國再伐而亡 一曰其國當  
者滅亡四夷來侵 又曰居月見不出三年人主死不  
死國有殃 又曰星見月中不出其年主憂 又日月  
未中而日星入之有賊人為政者在東方文者長武者  
亡月過中而星入之有賊人為政者在西方武者長文  
者亡 又曰他星八月中兵將起他國有來降者 高  
宗曰星八月中將有大兵 海中占曰星八月中其國

若有憂一曰不出三年臣勝其主 京氏曰星八月中  
臣賊其主奪其家 又曰月中有星天下有賊星多者  
賊多 又曰星八月中大臣謀伐其主主令不行 荆  
州占曰星八月其國有喪 又曰星八月中有破軍殺  
將又曰大客星八月中月無光其國滅亡四夷來侵期  
五月若十月又云客星貫月其國內亂大臣死 洛書  
曰星在月右角者秦氏丁氏為姦在西宮中 又曰星  
在月左角竇氏宋氏為姦在東宮中星在月上者鄧氏

司馬氏為姦在南宫中星在月下者趙氏李氏為姦在後宮中星在月兩角劉氏為姦敗 孝經內記曰月在星角者臣與黃門僮女人陰姦為賊兩星在月角者臣與人君共作姦一星在月中臣與君婦女共作姦謀一星在月下者後宮列女要臣為姦也 河圖曰星在月陰負海國有勝星出月下芒相爍也君死人飢 京氏曰星與月同光臣下作亂人民非上令不行 甘氏曰星食月其國相死 洛書曰星毀月下司上

客星犯歲星四

荊州占曰歲星與他星合人主不安 又曰歲星與他  
星薄之主有謀又曰有賊 又曰客星與歲星鬪不出  
其年強國易相 巫咸曰他星守歲星越有憂一云城  
邑有憂 甘氏曰有星守歲星人主有憂 春秋緯曰  
歲星與他星會而鬪因破他星人主不寧他星薄破之  
主有謀賊害

客星犯熒惑五

石氏曰熒惑與他星會而鬪者皆為禍 荊州占曰熒惑與他星會而鬪天下兵起他星破熒惑為禍熒惑破他星會事雖有不能為禍 又曰熒惑與他星合相陵而鬪二星相近者其殃大相遠其殃小

客星犯太白六

甘氏曰有星入太白中強國以戰亡 又曰有星入金星天子伐諸侯武士大將死 郝萌曰縣亂星出也常出太白之旁相去三四寸所星出天下大亂 又星從

他所來之太白旁居與往來亦為使其事急又太白與他星過於四方必有大敗 又太白與他星遇太白避他星兵畏他星避太白兵成

客星犯辰星七

巫咸曰有星入水星天下大水大理御史官多死 班固天文志曰辰星與他星遇而天下亂 石氏曰辰星與他星會光相薄乃為害不相及雖同會不為害 荆州占曰辰星與他星會破之刑事行他星不破刑事不

害 石氏曰辰星出與他星遇而鬪天下大亂

唐開元占經卷七十七

欽定四庫全書

唐開元占經卷七十八

唐 瞿曇悉達 撰

客星占二

犯東方七宿

客星犯角一

甘氏曰客星干犯兩角間白者軍起不戰邦有大喪其  
色赤戰所指必有破軍侵城期七十日或三年 石氏

曰他星入左角兵吏有來擊者色赤皆以兵擊黃皆以土訟白皆以義黑皆以死青皆以憂 巫咸曰客星入左角獄多死囚 荊州占曰黃星若白星入左角裏有受咎者又曰獄官吉入右角尉有喜 荊州占曰赤星入左角兵吏有攻者也黃訟土事白以好訟青以憂訟黑以死訟 石氏曰白星入右角兵吏有易者青以憂去黃以好去白以義去黑以死去 海中占曰赤星入右角兵吏有置兵軍受命者 夏氏曰客星入角五穀

傷蝗虫生 郝萌曰黑星入右角兵吏有以喪置兵者  
色黃若白以好置兵青以憂置兵 又曰客星入角將  
相后族家有收斃者 石氏曰赤星從兩角間過不入  
亢中有兵色白有過客色黑有過喪 郝萌曰有星出  
亢入兩角間君有使諸侯有口令色赤言兵黃言土白  
言義青言憂黑言凶 石氏曰他星出左角獄吏易者  
色赤以兵色黃以好去色白以義去色黑以死色青為  
憂 郝萌曰有星出左角與星相迫大如缶赤如血其

名為禍星三日三夜不入命曰動兵三年而國亡以其  
日占之 又曰黃白星出左角獄嗇夫受梃色青有大  
憂色黑有死者 石氏曰有星出右角有驚將色赤將  
不勝青憂黃將去白不戰黑將死 海中占曰大赤星  
出右角國門有出兵左角國入兵 郝萌曰黃星出右  
角國有驚一云兵驚不戰受地星白者不戰而進色黑青者  
戰不勝凶 荊州占曰赤星出右角郝萌曰出右角入左角也將有  
攻吏者國有驚其星不搖散不統絕戰勝 巫咸曰客

星出角臣謀其主賊從外來天下大亂將相將有誅者  
海中占曰赤星出角亢間國邑有圍者 郝萌曰大

赤星若白星出角亢國有大盜黃星出北止天門中天  
下兵在外者罷客星出角兵大起期不出二年 荊州

占曰赤星出兩角間國有恐人民驚又曰經兩角間軍  
道塞 二十八宿山經注曰有客星如半席出於角亢

則其年韓土有死兵公使大臣謀死多災殃 郝萌曰

赤星經兩角間國門閉可以觀邑門之閉開也星白軍

在外道塞 赤星從兩角間過不入亢中有過兵 黃  
白星數就右角若左角兵使有受地者 赤星大如鋒  
夫赤如雞血數就右角若左角兵使遇賊 黃帝占曰  
大黃星之兩角間有貴客來見君廟將有事 海中占  
曰黃星起右角之左角尉理受執 黃帝曰赤星止兩  
角間國門閉其食道絕 陳卓曰客星舍角天下有陷  
地 郝萌曰客星入舍右角小人有兵多恐兵起不用  
石氏曰客星守左角色赤天下大旱五穀不成 郝

萌曰客星守左角獄吏多寃 石氏曰客星守右角有

大水

巫咸曰客星守右角

一曰色赤多暴虐事

郝萌曰

客星守南角間赦

一云黃星守兩角間

不盡出期不出四十日

班固天文志云客星守兩角間姦人在宮庭 黃帝占

曰大客星守角白天下中隔不通 石氏曰客星守角強

臣寵取國勢他星守角獄多訟 巫咸曰客星守角五穀

不登大旱不生草木 郝萌曰守角臣謀其主一曰賊

臣從外入 又客星守角大旱五穀不熟燠旱不生一

曰色赤守角有兵 又客星守角天庭大臣有亂者凶  
一曰入天庭十日天下大亂 又客星逆行守左角穀  
貴 荊州占曰客星犯守角大旱五穀不登富人貧  
又赤星畱守兩角間有兵國閉青有大獄事白有義來  
者黃有土功黑有凶人主有殃

客星犯亢三

甘氏曰客星干犯亢中國不安兵起政亂期一年 石  
氏曰有星出入角間入亢色赤有過兵白有過客黑有

過喪 海中占曰客星數入亢國疾疫出亢疾已 夏

氏曰客星入亢人流亡 郝萌曰客星入亢天庑十日

天下大亂 又客星入亢有小旱期三十日 又曰旱

又曰有小水八穀水傷又曰五穀不登為後年

一書云五穀豐

人有禮讓 又曰客星入亢兵戰士卒行不出九年又曰天下

大亂 荆州占曰客星入亢中天下有德令色白期秋

赤期夏黃期六十日黑期百二十日 又有星出氏入

亢中而散人主有病從帶而上 東官候曰赤星入亢有

宗廟事色黑廟中有喪色青見血白有兵女主有喪

百二十占曰他星入亢有來使者受命於廟色赤言兵

黃言土白言義青言憂黑言憂客 石氏曰有星出亢

有出使者以色占赤言兵黃言土白言義青使者憂黑

使者凶一曰多兵 郝萌曰有星暴出亢愛臣以口舌

事自殺期一月若一年 又黃星白星出廟以社中人有

受賜者 又黑星出廟北而南入廟女主有客事者有

廟之事 又客星出入亢五穀不登為後年 石氏曰

有星經兩角間亢諸侯客有來者廟將有事有口令  
海中占曰大赤星從角就亢人主遇賊 郝萌曰客  
星與亢合相為亂國易政 黃帝曰赤星集亢氏間廊  
廟間有陳兵 海中占曰客星出亢若守之其國大旱  
五穀傷貴人去其鄉人民流亡若芒角變色地動為害  
期三年 黃帝曰客星守亢國臣不祥 巫咸曰客星  
守亢有德令 郝萌曰客星守亢天下通臣有謀其主  
者軍敗不成多虫蝗糶貴絲貴有奇令 又客星守亢

下田傷 東官侯曰客星守亢則五穀頻不成糴貴  
荊州占曰客星畱守亢色赤旱青黃人去其鄉黃無他  
害黑人民流徙貴人憂芒角變色地動搖宮 海中占曰  
客星犯守國多妖祥

客星犯氐三

甘氏曰客星干氐中後宮有亂暴兵動期百八十日  
遠三年 黃帝曰有客星入氐色白即將嗇夫受賜色  
黃遷色青黑不死則亢 又客星入氐日食地震糴貴

石百五十有奇令

一云羅石千五百穀為五

石氏曰客星入氐棺柳貴

甘氏曰客星入氐

文曜鉤云守氐

邊邦有獻女者海中占曰

大赤星入氐卒大出

郝萌曰客星數入氐有疾

一云沒巴數

出疾已

陳卓曰客星入氐兵從邊起若後宮亂暴兵動

五穀不成

荊州占曰客星入氐麥麻羊貴黃帝曰客

星出氐

一云入氐

色黃白與兩星齊期十日而赦去兩星二尺

期百日有赦

黃帝曰有星出氐若有疾於國外文曜

鉤曰客星出氐人主憂病一曰有德令若邊國有獻女者

郝萌曰有星入氐中而散入主有疾從帶下而上荆  
州占曰有星入氐中人主有疾從帶而下 石氏曰客星

起氐中天子不安宮移徙女失坐 郝萌曰客星乘氐下

星馬牛大貴 黃帝曰客星逆行入貫氐中央日月薄食  
郝萌曰客星逆入貫氐中大人奪執失威大臣乘國之

權又客星逆乘滅氐有土功事 黃帝曰有星守氐色黑

大水其國有復王白廊廟有憂黃有喜亦有兵在廟中近  
臣謀弑貴人 文曜鈞曰客星守氐人主憂帶下病 石

氏曰客星守氏有謀臣欲危其主 巫咸曰客星守氏

兵起國亡天下受圖而俱起亡軍 海中占曰客星守

氏有德令 郝萌曰客星守氏天下中外不通馬不急

行國易政

案後魏志武紀曰桓帝時有黃星見於楚宋之分遼東殷墟善天文言後五十歲當有真

人起豐沛間其鋒不可當至五十年而太祖破袁紹天下莫敵

荆州占曰客星守氏

木器布帛倍價 郝萌曰客星逆守乘滅氏諸侯王

坐法者誅絕無後

客星犯房四

河圖曰客星干房失春政不法 甘氏曰客星干犯房  
王國空兵起人饑骨肉相殘 黃帝曰客星入房糶石  
千錢人多餓死相食多移去其田宅皆期後年 石氏  
曰客星入房輸食有入者出房輸食有出者 赤星入  
房國名寶用龍馬貴客星入房諸侯有獻馬者糶大貴  
郝萌曰赤星就房國圍又曰入房馬貴出房名寶有  
出者 客星入左服若右服其有來獻馬者出左右服  
人君使諸侯以馬為幣 客星入房有大臣弑其君者

又曰入天府天下有變更之令若有急令 客星入天  
廡之中滿三日而去有赦 荊州占曰白星入房下北  
門有攻戰排門者在於近臣期百二十日 客星入天  
府有德令一曰有賊人一曰有兵發一曰天下且有天  
喪 韓揚曰白星入房赦 黃帝曰客星出 玉歷云出  
若守之  
在陽為旱為喪為饑在陰為兵為水亦為饑 班固天  
文志曰漢孝武元光元年六月客星見於房二年十一  
月單于將十萬騎入武州漢遣兵三十萬以待之 郗

萌曰客星出房近臣謀主若暴死期一年 又有星出

房左為父次為太子出房右為母次為長女 荊州占

曰青星出右驂若左驂而散人主為牛犇敗 郝萌曰

客星在表之北多水去下田耕高田在表之南多旱去

高田耕下田 客星在中道天下太和馬貴一曰牛貴

客星舍房左右羣臣有奪地者 又曰吞藥死者 石

氏曰客星守房左驂馬貴 客星守房宮有謀臣臣欲

無其主 巫咸曰客星守房糴貴 郝萌曰客房天下

有急令且恐治馳道又曰馬疾一日人主以馬為憂  
海中占曰客星犯鉤鈴主有犇馬之敗 石氏曰客星  
犯鉤鈴王宮大亂不出三年

客星犯心五

石氏曰有星入心諸侯有來使者星出心君使人於諸  
侯色赤言兵也色黃言土功色白言義色青言使者憂  
色黑言客凶 甘氏曰赤星入心留迴之天子不有喪  
當兵死 夏氏曰客星入心有德令 郝萌曰客星入

天子之宮十日成勾已天下有大赦 客星入太子宮

太子益官

一本云太子不得代

黑星出房而入心近臣謀主若暴

死期一月中 客星入心丞相憂疾又曰大赦期三月

赤星入心右星太子有兵入心左星庶子有兵 青

黑星入心右星太子有憂若有罪入左星庶子有憂若

有罪 黃白星入心右星太子受賜入左星庶子受賜

甘氏曰客星出心天下大旱兵起滿野車騎用國易

政期三年 郝萌曰客星出心中央星以南若左右有

抵罪而走者黃白無故青憂黑死赤以兵隨之 又曰  
心上有一星去心一尺所有中謀下有星去心一尺所  
有外謀星多謀多星少謀少謀多者謂人多也上下俱  
星中外俱有謀星遠人遠星近人近近期百日中期在  
衝月遠期在一年中 荊州占曰以四月五月在心尾  
間至七月八月大虫從東南來 黃帝曰有星大如足  
布貫尾判心下星諸侯有來附兵於君者 郗萌曰客  
星舍心兵起 客星逆乘滅心有謀易君者宮內有亂

謀權在宗家得執大臣 黃帝曰客星守心不過三旬  
有善令 赤星大如鋒矢赤如雞血入守心人主遇賊  
其出心也行道甚遠人主戮於千里之外 聖洽符曰  
客星守心五十日不去兵大起國有喪人民以饑亡糶  
貴十倍期不出百八十日遠一年 巫咸曰客星守心  
糶貴人饑兵臣謀有姦臣成勾已有德令期三月十月  
稷布大貴 郗萌曰客星守心有土功有大喪大人  
當之又曰人疾 客星守心中央星大人憂守太子太

子得立守庶子庶子誅 客星守心赤為亡兵青黑為

憂 客星守心二十日穀大貴 荊州占曰赤星守心

大軍兵滿野車騎用布帛貴嬪女運穀三年易改 雜

候集曰他星守心其國亡邑有善令 天旬占曰客星

守心蜚蝗大起糶大貴十倍萬人饑流亡在道下有謀

叛逆者 石氏曰客星犯守心宮鐘大鳴劔戟大橫大

臣相疑天下兵起心變期急近期七日中期七十日遠

期百八十日 荊州占曰客星犯乘守心者大旱天下

脩火近期十日遠期三年

客星犯尾六

黃帝曰客星入尾歲饑人相食多死者 聖洽符曰客  
星入尾大水其入之順行有德逆行凶 石氏曰客星  
入尾北夷大饑來降 客星入尾人多移徙 又曰入  
天司空多上功事有尾之禽大貴天下大水黑星若蒼  
星入尾故臣有來使者 白星入尾箕邊城將侯司空  
死之 客星入尾皇后有以珠玉簪珥惑天子者 客

星入尾多風一曰水祥一曰雨降 客星入尾宮人惡  
之 荊州占曰客星入尾天下大振一東一西一南一  
北男不得耕女不得織

客星犯箕七

黃帝占曰客星守箕多土功事又曰守箕北小熟守箕  
東大熟守箕南小饑守箕西大饑 石氏曰客星守箕  
天下饑色赤則為兵 郝萌曰客星入箕民流亡若出  
箕宮人出 荊州占曰客星入箕多風暴雨宮女不安

或外國有使來一曰官木用 武密曰客星入箕則有  
風雨 天文總論曰客星入箕有土功事守箕則秋冬  
水災 天文錄曰客星出於箕民饑大臣有見棄者入  
箕北夷饑

唐開元占經卷七十八

欽定四庫全書

唐開元占經卷七十九

唐 瞿曇悉達 撰

客星占三

犯北方七宿

客星犯南斗一

甘氏曰客星干犯南斗度其國必亂兵大起期一年

陳卓曰客星干犯南斗王者疾病臣謀其君子謀其父

弟謀其兄是謂無理諸侯不通天下易政期百八十日遠  
不出一年 黃帝曰客星入南斗中三尺三日不去城

郭閉道不通貴人坐之又曰入鉞鉞外兵擒士卒殺傷

其將外國來降

北官侯曰國  
來而不降

河圖曰有星入南斗有

君來見吾君者 聖洽符曰小赤星氣交入南斗建中

此揚見精者宮人子方生非其子也 石氏曰有星入

南斗諸侯客有來見天子者出斗天子使人之諸侯色

青皆言憂赤皆言兵黃皆言土白皆言義黑皆言凶

客星入南斗中三日三夜天下有赦期三月 巫咸曰  
客星入南斗諸侯不通天子且有舉兵伐父者弟攻其  
兄 夏氏曰客星入南斗諸侯相攻伐 郗萌曰客星  
入南斗多盜賊以十一月四月入斗中天下赦無餘囚  
期六十日遠期六月 陳卓曰客星入南斗中穀不登  
人相攻 石氏曰客星出南斗兵革大起有大水天下  
饑人相食一曰闕梁不通期二年 宋書天文志曰晉  
孝武太元二年三月客星在南斗至六月乃没占曰有

兵一曰有赦是後雍竟冀常有兵役十二月正月大赦  
八月又赦 邠萌曰赤白星暴出南斗魁前宮室兵起  
中魁神將軍坐之戮死 帝覽嬉曰客星居南斗道不  
通 黃帝曰客星守南斗五穀登賤貴於後冬 文耀  
鉤曰客星守南斗五十日大臣有謀兵大起國易政王  
者有憂期三年 黃帝曰客星守南斗其君不親信其  
臣有兵興 石氏曰客星守南斗天下有喜福五穀熟  
邠萌曰客星守南斗諸侯謀王者役軍人皆走又曰

大旱宮廟有火之憂人多疾疫 又曰客星守南斗天  
下易政一曰兵官憂一曰以水饑 班固天文志曰元  
帝初元元年四月客星大如瓜色青白在南斗第二星  
東可四尺其五月渤海水大溢 荊州占曰客星守天  
庫兵革起

客星犯牽牛二

陳卓曰客星犯牽牛有犧牲之事 石氏曰客星中犯  
牽牛吳越兵自立三年而滅期不出一年遠三年中

彗要占曰客星干犯牽牛中國起兵 黃帝曰客星入  
牽牛諸侯有兵又曰入天鼓外國來降 郝萌曰客星  
入牽牛大臣外交諸侯赤黃白成青黑敗又曰有星入  
牽牛諸侯客有來以四足虫為幣者出牽牛君使之諸  
侯以四足蟲為幣色青皆道疾黑死不至 荊州占曰  
客星入牽牛有兵發而行 甘氏曰客星出牽牛有兵  
起大將出若闕梁不通若地大動馬牛貴三倍期二年  
巫咸曰客星出牽牛其國兵起大將出若闕梁不通

多死期不出一年 陳卓曰客星出牽牛兵北行 郗

萌曰客星舍牽牛臣謀其主五穀不登 續漢書天文志

曰孝明永平九年正月戊申客星出牽牛長八尺歷建

星至房南滅見五十日牽牛主吳越房心為宋後廣陵

王荆與沈涼楚王英顏忠各謀逆事覺皆自殺廣陵屬

吳彭城古宋地 石氏曰守牽牛越有善象獻中國

甘氏曰赤星守牽牛人民為亂 郗萌曰客星守牽牛

王者外其大臣 又曰客星守若入牽牛盜賊在江海

歲多水

案司馬彪天文志曰孝順永建六年十二月壬申客星芒氣長二尺餘西南指色蒼白在牽牛

六度後一年會稽海賊曾於等殺長吏拘奪吏民揚州六郡逆賊章何等犯四十九縣大攻吏人也

地軸

占曰客星守牽牛地大動海中占曰客星出入守牽牛馬貴價三倍

客星犯須女三

陳卓曰客星干犯須女隣國有以竒女來進侍者妾近為后石氏曰客星入須女諸侯有進女侍者陳卓曰客星入須女麻貴諸侯有兵江淮道路不通 郝萌

曰客星入須女留不去天下諸侯王有不通者一曰父子不通 荆州占曰客星入須女有嫁女娶婦事多絲帛絮貴 帝覽嬉曰客星出須女宮人有謀女主憂兵起宮門若貴人有死期一年遠二年 石氏曰客星出須女有嫁女事黃白吉青黑凶赤憂 郝萌曰客星暴出須女女主戮罪期一年 又客星舍須女留不去有奇令 百二十占云他星出須女御女有出者 黃帝曰赤星守須女女子之喪 孝經內記曰客星守須女

有奇女降絲絮布帛貴 甘氏曰赤星守須女人民為  
亂 甘氏曰客星守須女南有獻女賤女暴貴 郝萌  
曰客星守須女女子亂其國亡其政 赤星守須女有  
急兵食貴人自賣者一去女妻為妻 陳卓曰客星守  
須女糶貴 北官侯曰青星入須女多以兵事死者  
百二十占云他星入須女守之天下有內美女者 荆  
州占曰有黑星出須女有喪

客星犯虛四

郝萌曰客星干犯虛中哭泣之事有井田之法改制之  
事 黃帝曰客星入虛有軍在外大饑將離散卒死亡  
天下有大令 石氏曰客星虛中主出將有二客星天  
下無處主 客星入虛中色赤有遊客入國色黃白吉  
色青黑有凶事 郝萌曰客星入虛種貴糴大貴又曰  
天府有德令期十一月 客星入虛中三日環之有赦  
期七十日 客星入虛大人當之 客星入虛危色赤  
有贄客來者色白有無幣客來者赤星入虛糴貴人有

自賣者 荊州占曰客星入虛天下大亂政急大人憂

其國饑 百二十占曰他星入虛危青若黑有以喪事

使者 石氏曰有星入虛危色青黑有哭泣之事 客

星出虛大臣為亂兵大起國有喪天下有哭泣之事期

三年 案司馬彪天文志曰孝安末初三年十一月甲午客星見西方色蒼白在虛危南至胃昴至建光元

年三月癸巳 郗萌曰客星入虛君使人之諸侯亦無

幣青黑有告喪者 客星出入虛天子自將兵於野

客星舍天府天下有急行期十月 石氏曰夏三月視

虛中有奇星一在虛邦不居其處有奇星二將死有奇  
星三相死有奇星四將軍敗有奇星五大凶 司馬彪  
天文志曰客星在虛危為喪 孝經章句曰客星守虛臣  
亂其上而不知又曰國君死或有德令 甘氏曰客星  
守其國兵 玉歷曰客星守虛三十日不去其國君死  
若大臣有戮兵喪並起期百八十日遠一年 百二十  
占云他星守虛有謀 巫咸曰客星出虛而守之其國  
君死若大臣有戮期百八十日遠一年 石氏曰客星

犯守虛近一年遠二年當有哭泣之事

郝萌曰國有哭泣之事

陳卓曰客星犯守虛天下有謀

### 客星犯危五

郝萌曰客星犯危國有哭泣之事

案宋書天文志曰魏明帝景初二年十月癸巳客星見危

逆行在離宮北騰蛇南三年正月明帝崩

一曰多雨水五穀不收人相食於道 荊州

占曰客星入危有土功王者築宮室不出一年大水不出三年大飢萬人無食 百二十占曰他星入危有蓋屋之事色赤大變青憂 甘氏曰客星出危大臣被刑

法官有憂國多水災有土功王者築宮室期不出年

甘氏曰赤星出危以火廢國 郝萌曰客星出危中大

水一曰大饑 甘氏曰客星守危王者遷都其國更立

侯王 郝萌曰客星守危天下必有易政更令 客星

守危人主失勢奪土強臣專國命在台族又曰具有大

風有所危敗又曰不出三年王者蓋屋治宮天下匠工

起多土功又曰人流亡 郝萌曰客星守危國政危

巫咸曰客星入守危糴大貴不出三年 荊州占曰客

星守危若彗星干之王侯有薨者王改服不出百八十

日黃帝占曰以日入命其國

黃帝曰客星入守危若出危大饑人

食貴為後年 郝萌曰客星守墳墓人主有哭泣之聲

### 客星犯營室六

郝萌曰客星犯營室國且有宗廟哭泣事 黃帝曰竒

星入營室中者天子有憂 河圖曰客星入營室順行

有德逆行凶 聖洛符曰黑星起廟南入廟北女主有

死者死者廢廟之事若出廟以北行中人有鳩死者或

曰廟祭之事 黑星出月入廟人主有藥死不然有藥  
人主者 巫咸曰客星入營室天下有兵又曰人民流  
食千里 海中占曰客星入營室有軍軍中大饑將離  
散士卒死亡 郝萌曰客星入營室外夷兵起貸倉多  
饑死者 客星入營室邊外起兵此為外夷之事 客  
星入營室國亂去其主 竒星入營室不盜即賊大亂  
又曰無兵兵起有兵兵罷星大軍皆大星小軍皆小  
黑星起廟北而南入女主惡之 客星從東壁入西

壁廟若城郭有起者 赤星入廟人臣謀主 荊州占  
曰他星入營室諸侯有來使者出營室君使人之諸侯  
色赤皆言兵白皆言義黃皆言土青皆有憂黑皆凶  
又奇星入營室有陰雨垣墻無立者 又黑星出入廟  
廟上有死者不死者見血起廟北而南入女主有死者  
有廟廢之事 聖洽符曰白星出廟正南廷有兵或曰  
赤亦然 客星出營室國有土功人大饑大臣為亂兵  
大起士卒亡

齊伯日期一  
年不二年

春秋緯曰星赤黃出營室

中名曰怪獲主竒去其國貴人有死者上旬見其年髮  
半白來月上旬死中旬見其年鬢白來月中旬死偏任  
后雄烈之毒也下旬見其年盛壯來月下旬死將用事  
毒害流 郗萌曰客星出西壁若東壁城郭有壞者

赤星出廟上正南抵庭有兵作廟上有兵 白星出廟  
以北中人有受賜者 黃帝曰赤星從東壁之西壁臣  
有戮其主 聖洽符曰赤星在營室有死者不死者見  
血 郗萌曰客星舍營室其國且作宗廟多土功事畱

不去匈奴有兵來 石氏曰客星守離宮兵起人君有  
憂一曰有急 甘氏曰客星守營室有軍者客降主得  
人地 郁萌曰客星守營室亂出其城郭之事 有奇  
星守東壁天子為軍自守一曰天下搖動在四方 黃  
帝曰客星入若守東壁諸侯相謀 郁萌曰客星入若  
守東壁天下且有大喪白衣滿野

唐開元占經卷七十九

欽定四庫全書

子部

唐開元占經卷

八十二

詳校官中書臣李采

靈臺郎臣倪廷梅覆勘

總校官編修臣王燕緒

校對官中書臣王慶長

謄錄監生臣錢雋選

欽定四庫全書

唐開元占經卷八十

唐

瞿曇悉達撰

客星占四

犯西方七宿

客星犯奎一

石氏曰客星犯奎國有溝瀆之事 黃帝曰客星犯入

奎破軍殺將 甄耀度曰客星亂芒而角入奎有破軍殺

將王者有憂人主當之期三年 石氏曰客星入奎外  
夷起兵麻泉貴 甘氏曰客星入奎強國奪地變爭兵  
起白衣自立擾中國 郊萌曰客星入奎刀劍布帛貴  
赤星入奎兵起期十年一曰出奎國兵出一曰數入  
奎國兵聚 客星入奎西夷有兵來到而還 客星入  
奎諸山水澮 荊州曰客星入奎邊兵大動土功大起  
陳卓曰客星入奎武庫之臣且有罪 西官候曰客  
星入奎赤邊兵大動黑天下溝渠之事黃土功大起

石氏曰有星入奎有無所受命而來使者 荊州曰有  
星入奎有陂瀆之事於國中出奎有陂瀆之事於國外  
黃星入奎宮有土功事宮中有變 西官候曰赤星  
入奎兵聚有敗軍 巫咸曰客星出奎邊兵大起白衣  
立為王刀劍大出奎國兵出入奎國兵聚 荊州曰星  
赤黑出奎有敗軍 西官候曰赤星出奎外夷動兵  
石氏曰有星出奎有無受命矯使者 巫咸曰赤星逆  
行從婁至奎有兵 郊萌曰客星舍奎留不去飢一曰

繒帛貴 黃帝曰赤星守奎糴賤 却萌曰客星守奎  
糴賤賊臣在側其事敗又曰謀臣有巧偽惑天子者一  
曰國以佞亡又客星守奎天下修兵臣有國者 客星  
守奎有殺霜不時下者一曰牛疾疫一曰六畜貴 荆  
州曰客星守奎王者憂大人當之又曰魯國起兵 玄  
冥占曰客星守奎強國爭起兵有白衣自立動國

客星犯婁二

石氏曰客星干犯婁國有大兵四時紀祠婁主苑牧給

享祠天以奉宗考王者以承天諸占遠不出三年 黃  
帝曰客星入婁糴大貴在後年 石氏曰客星入婁外  
夷兵起有聚衆之事 郝萌曰客星入婁中三日環之  
天下有赦贖作期七十日 赤星入婁兵起期十年  
荊州曰客星入婁旱千里有火災其國燔燒金銀用倉  
庫虛天下人民多疾病 百二十占他星入婁有聚衆  
於國內石氏曰客星出於婁邊城和 荊州曰客星出  
婁有罷衆之令 西官候曰有星出婁有白服衆事

百二十占他星出婁有罷衆於國外 石氏曰客星守婁人民亂一曰有聚衆之事 却萌曰客星守婁天下大虛臣有感天子奪主之權者歲多獄訟布帛貴又曰有從諸侯來附其君不成一曰多獄訟 又曰客星入若守婁其國且燔燒困倉 海中占客星出婁而守之天下欲有分奪國者一曰客欲奪王國邊境侵地期一年遠二年 却萌曰客星守犯婁天下欲分社稷者白衣自立者牛馬貴一曰有白衣之聚

客星犯胃三

石氏曰客星干犯胃五穀不成倉庫空虛海中占客星犯胃有軍發之事陳卓曰客星犯胃倉粟用石氏曰有星入胃有葆食之事入出胃葆食之事出者又曰客星入胃王者有倉之事其有出胃中有出穀粟事却萌曰客星入胃中三日一環之期七十日赦又曰五穀大貴天下無聚物荊州曰有星入胃王者有廩倉之事百二十占客星入胃飲食之事入出之飲

食之事出 黃帝曰客星出胃入廂人主食藥死一曰

有藥人主者 荊州曰客星出胃有出穀粟事 玄冥

占曰客星出胃王者備四夷強臣陵國有大兵天下發

粟金銅之事期百八十日遠年 孝經章句赤星守胃

國無事 甘氏曰客星守胃強臣陵國 郝萌曰客星

守胃留不去天下飢 荊州曰客星守胃天下有發粟

事金銅貴 郝萌曰有星入若守胃有奇令又曰客星

乘滅若守胃國官之倉有大兵焚燒其倉

客星犯昴四

黃帝占客星入天獄中二月天下有赦期五月石氏  
曰客星入昴有白衣之會於國內又曰貴人有繫囚者  
昴濁之間天街也若客星守之天下有謀慮 郗萌曰  
客星入昴天下且有喪又曰衆獄且妄殺不辜以誤  
主上客星入昴畢間諸侯有謀上者又曰留三日赦不  
留有憂 客星從昴陽入有客 荊州曰客星入天獄  
中有德令水泉出民去本土就丘邑 西官候曰客星

暴出胃入昴中國大人暴死期一年 百二十占他星  
入昴貴人有德令若出昴兵衆滿野 司馬彪天文志

曰孝明永平十四年正月戊子客星出昴六十日昴主  
邊兵後漢遣奉車都尉顯親侯竇固等將兵三千餘人  
擊匈奴 石氏曰有星出昴兵衆滿野非喪則會也

郝萌曰客星從昴陰出有走主 客星居昴北有別離  
之國奪地死者 客星入若留昴王者絕嗣同姓有起  
入為主者 客星舍昴不去天下囚多則盜賊並起若

留十餘日不去回紇內相賊國家兵起回紇來降 有  
星入舍昴南糴一貴一賤 聖洽符曰他星守昴漁獵  
起 石氏曰客星守昴萬民亂 甘氏曰客星守昴有  
詐稱王命者不出百八十日 郝萌曰客星守昴讒臣  
有蔽主德者又曰有謀以藥害上者又曰囚徒有聚兵  
弩攻獄者 西官候曰客星守昴執法臣誅 客星占  
曰客星守昴朔地殃天下多亂獄 百二十占他星守  
昴萬民憂 文耀鉤客星出昴若犯守之當有詐稱王

令譎命中國若有妄言讒諛者必有自敗 郝萌曰有  
星入守昴金器刀劍貴 荊州曰客星犯守昴讒諛賊  
臣在內諸侯謀上一曰有白衣徒聚謀慮

客星犯畢五

黃帝曰有星入畢中而復出其星小小赦星大大赦  
聖洽符曰客星入畢順行有德逆行凶 石氏曰客星  
入畢人主獵一曰有以獵惑人主者一曰兵起邊兵大  
動一曰羊貴又曰大赤星入畢口天下大赦期十五日

若三十日六十日將相有大憂 郗萌曰客星入畢多  
獄事一曰貴人有繫囚者 黃星入畢三夜常見相死  
九十日后死百二十日大人當之 客星入畢中二月  
天下有赦除責期五月 客星入畢口與兩股齊者有  
走主又曰期四十日兵發率一日而十日兵罷其去也  
視其東南西北所往及其所近宿或受兵 客星入畢  
中與兩股齊期四十日兵發直一星期二十日兵發居  
期十日兵發 荊州曰客星入畢四夷兵起並為盜

西官候曰客星入畢中率一日為十日諸侯女主當之  
君有憂先起兵者亡 百二十占他星入畢有兵革謀

春秋緯曰赤星出濁大卒出 孝經章句曰客星出

濁中國人為亂有走君在濁傍有讒臣在傍者入濁兵  
起 巫咸曰客星出畢邊兵為亂四裔兵起疆宇靡寧

天下飢必有亡國近一年遠二年 郝萌曰客星出畢

邊有兵車馬有急行 荊州曰客星出畢人主好畋獵

郝萌曰客星從畢赤黑陰出有走主 西官候曰客

星居畢中不時出主喪 却萌曰客星入畢中留不去

馬貴一曰牛貴 黃帝曰客星守畢歲大饑 石氏曰

客星守畢大臣有謀者邊有謀臣一曰讒臣蔽主之德

甘氏曰客星守畢外國稱王詐來不可信外臣謀叛

興近臣通奸 却萌曰客星守畢大臣憂多陰謀其事

不成一曰有土功風雨不時穀貴又曰有走主 客星

飛守畢有德令 客星守畢天子絕嗣無後 案宋書天文志曰晉

惠帝永興元年五月客星守畢 又曰星守畢后族可收

光熙元年惠帝崩終無繼嗣也

者一曰霜大下一曰諸侯有謀慮一曰溝水大出 荆

州曰客星守畢王者大將出 黃帝曰客星入若守畢

有福有德令 陳卓曰客星犯守畢大臣有誅者無兵

兵罷

石氏曰視其東西知其往國受兵

河海盈溢人民多流亡

郝萌

曰客星守附耳兵一曰邊兵尤甚

### 客星犯觜觿六

荊州曰客星干犯觜觿其國破亡 黃帝曰客星入觜

觿車馬有急期四月五月 郝萌曰客星入觜觿有大

喪 荆州曰有星入觜觴色青凶亦有喪黃若白吉喜  
黑死若有水災穀糶百倍 黃帝曰赤白星入觜觴若  
暴出觜中臣與外臣謀弑其王星遊行先覺不得成不  
行不明不覺期一月

石氏曰星  
明期三月

百二十占他星入觜

觴有葆旅之事於國內星出觜觴有葆旅之事於國外一  
曰兵罷 巫咸曰客星出觜觴國有大喪若有侵土欲  
為君王者若有水災穀貴糶百倍人多餓死期不出三  
年 陳卓曰客星食觜觴食太貴 石氏曰客星守觜

觴魏有良臣輔國主在西南二千里 甘氏曰客星守  
觴觴西戎動侵王欲為君王者崇禮以制義則國安  
却萌曰客星入守觴觴牛馬有急行 却萌曰客星犯  
若守觴觴其國破亡一曰食貴一曰有大喪

客星犯參七

黃帝曰有星入參中央星色白縣令有賜若伐色青黑  
縣令有罪 夏氏曰客星入參五穀貴 百二十占他  
星入參有衡石之事於國內星出有衡石之事於都外

色青黑不出一年兵大起國之邊境壞 石氏曰客星

入參中邊有暴兵起邊地圍而壞 郝萌曰客星入伐

有兵不足以傷又曰入天尉中十日宮中有自殺者入

其陽為男入其陰為女皆期三十日 郝萌曰有星入

伐有斬刈之事於國內若出伐有斬刈之事於國外色

赤以兵斬刈色白白衣斬刈 石氏曰赤星出參中央

星邊有兵縣令自將兵 客星出參邊有暴兵起邊城

有圍客軍入國若有戰期不出二年 郝萌曰有星出

參中者大臣有憂一星出則一人有憂二星出則二人有憂三星出則三人有憂 客星出參斧鉞兵出入斧鉞兵入 荊州曰客星出參而環繞之邊城兵起 石氏曰赤星出參武卒用若守之天尉中媵嫡相距 客星在伐色黑為水 郗萌曰客星在伐色黃為土功色白為喪 甘氏曰客星守參亡地 郗萌曰客星守參有小兵大臣有執主之命者若讒臣有女子惑天子者 一曰老人多死馬貴 又曰更易君色白為死赤為兵

黃為易位黑為憂蒼為小喜又曰旱糴貴 石氏曰客  
星守參魏多君子 巫咸曰客星入守參諸侯國當之  
邽萌曰客星守伐誅大臣

唐開元占經卷八十

欽定四庫全書

唐開元占經卷八十一

唐 瞿曇悉達 撰

客星占五

犯南方七宿

客星犯東井一

郝萌曰客星犯東井國有土功事小兒妖言 客星犯  
乘守東井此日國亂兵起 荊州曰客星干犯東井其

國用兵大臣誅期八十日 黃帝曰客星入東井五穀不收糴大貴 客星出北斗入東井有邑將治陂堤及水事 孝經章句曰客星入天渠道塗不通以水為敗

司馬彪天文志曰孝安永初元年八月戊申客星在東井弧星西南是時羌反斷隴道遣帥將左右羽林北軍五校及諸郡兵征之是歲郡國四十一郡三百一十五所雨水四瀆溢傷秋稼壞城郭殺人之甚也 石氏曰有星入東井有客以水令來者 郝萌曰客星出柳

入井主浮船 又曰入東井君失政臣為亂大人當之  
一曰宮中有大憂 荊州曰客星入東井貴人死若有  
奇令多失火火神從天下妖祥自地出 西官候曰客  
星入東井貴人有疾者 百二十占他星入東井有水  
事於國內 黃帝曰客星出東井宮中火起大人為亂  
兵大起將軍有憂若白衣有自立者其國必破期三年  
百二十占曰他星出東井有水事於邦外 郄萌曰  
客星出東井水潦且至 荊州曰客星經絕東井名水

有絕者 黃帝曰客星入東井中留十日而成勾已有  
贖罪之令期十月 客星守東井水 石氏曰客星守  
東井有旱蟲人多疾一曰貴人死以其國占之 甘氏  
曰客星守東井有白衣自立者其國破不出年中 巫  
咸曰客星留守東井四十日已上貴人女有懷子而化  
為水者 郗萌曰客星守東井多失火者一曰大臣為  
亂一曰三十日已上貴人女有懷子而死者一曰百川  
皆溢又曰天子以酒為憂貴人有族者男子不得耕女

子不得織 荊州曰客星守東井貴人有疾者 玉歷  
曰客星守東井左右秦以饑相有罪咎齊以聞梁有火  
災 西官候曰客星守東井色赤宮中憂留二十日貴  
人女有死不得子者色黑為大水舟船事有水令 巫  
咸曰客星出東井而守之宮中火起大人為亂王者以  
舟船為急河海溢土功並起人無食白衣有自立者其  
國破期三年 焦延壽曰客星入越大臣多斬者

客星犯輿鬼二

甘氏曰客星犯輿鬼國有非次自立者必敗亡 石氏

曰有星入輿鬼有詛盟鬼神祠祀之事於國內

南宮侯曰於國

外 夏氏曰客星入天尸帝王亡天下多病 郝萌曰

客星入天尸民多死一曰有大喪 客星入輿鬼人相

食 他星入輿鬼鈇鑕用大臣誅 客星入天尸金玉

府中三日一環之有赦 陳卓曰有星入輿鬼有軍若

大人憂 百二十占曰他星入輿鬼有祀事於國內出

鬼有祀事於國外 巫咸曰客星出輿鬼其國有喪出

南為人君出北為女主左為太子右為庶子若守四星  
隨其所犯發之期不出三年 荊州曰客星入輿鬼留  
三十日以上天下金玉用易錢 黃帝曰客星守輿鬼  
人君有大憂一曰貴人有大憂 孝經章句曰客星守  
輿鬼在中央主喪亡棺木貴倍其價 石氏曰客星  
守輿鬼秦有姦臣欲危其主 甘氏曰客星守輿鬼五  
十日不去國有大喪兵大起將軍戰於野多有死者期  
不出一年 巫咸曰客星守輿鬼南男子多死守北女

子多死守西長老貴人多死守東北一星棺木貴鐵器  
魚鹽大貴皆三倍 郝萌曰客星守輿鬼馬貴一曰牛  
貴又曰多土功事皆變易更政男子不得耕女子不得  
織 荊州曰客星守輿鬼東北星棺木貴守東南星五  
穀貴守西南星金錢貴守西北星鐵器魚鹽百倍 玉  
歷曰客星守輿鬼秦有疾 南官候曰客星守輿鬼入  
鈇鑽有兵罷 客星守輿鬼陣兵不戰 黃帝曰客星  
出若守輿鬼西若從西入輿鬼老人死出若守東若從

東入丁少年死 黃帝曰客星出若守輿鬼南若從南  
入輿鬼男子死出若守北若從北入女子死 荊州曰  
客星干犯守輿鬼天下有大喪陽為君陰為后左為太  
子右為貴臣又隨所守主 關  
王者發之不出七十  
日

客星犯柳三

荊州曰客星干犯柳周國當之期九十日 黃帝曰客  
星入柳道路不通 郗萌曰客星入柳兵從澤起又曰

大師有喪色黃有喜 荊州曰客星入柳兵大起人大

恐布帛綿絮貴 南官侯曰客星入柳有兵發行色赤

怒左右地大動 百二十占曰他星入柳名木有來入

者 孝經章句曰蒼星出柳諸侯有死者 郝萌曰赤

星出柳執法者遇賊 蒼星出柳殺邊諸侯 荊州曰

客星出柳兵大起諸侯有死者其國當之一曰有大水

人主遊船天下大饑人民流亡不出年遠二年 百二

十占曰他星出柳名木有出者 郝萌曰客星出入柳

人多移徙又曰出入天相天子變更其令 柳中有竒

星臣蔽主明有北軍之恥 客星舍柳天下有大兵期

二月若五月 荊州曰客星經柳山林有不伐者 黃

帝曰客星守柳庫兵大發天下人為王者治道 孝經

章句曰客星守柳庫兵發諸侯有死者 郝萌曰客星

守柳南宮有變一曰牛貴又曰羌夷起變天下弓弩聚

荊州曰客星守柳天下絲麻羊貴 百二十占曰客

星守柳大人棄其糧 郝萌曰客星舍柳先得地後失

之又曰犯守柳王者賜邊客

客星犯七星四

荊州曰客星干犯七星其國有大兵不出百八十日

石氏曰有星入七星有客以急事來使者出七星君使人以急事出者星色青言憂色赤言兵黃言土白言義

黑皆使者凶 郊萌曰客星入七星有立太子者若有

奇令又曰色青為疾白為喪 玉歷曰客星守七星布

帛麻梟貴津梁絕

南官候曰客星守天都山水會河

水決水且至人流亡去其鄉 百二十占曰他星守柳

天下變更 郝萌曰客星出入天都人多流亡一曰止

水溢又曰黑星結若就七星大人憂 司馬彪天文志

曰客星居七星為死喪 郝萌曰客星舍七星留不去

左右宮中以火為憂

一本云國家喜天  
雨五穀在宮中也

郝萌曰客

星舍天都五穀不成 黃帝曰客星守七星三十日天

下變更水大出道路不通 石氏曰客星守七星周有

大賢 郝萌曰客星守七星三十日天子憂廷中有賊

必易政一曰有德令又曰其國顯一曰必有客事有土  
功菽麻不收若小豆貴一曰馬貴一曰鹽貴 客星守  
七星天子必易政一曰兵大起又曰道路多水潦又曰  
溝渠道路不通一曰水大出 荊州曰客星守七星三  
十日河水決人去其鄉 石氏曰客星出七星而守之  
甘氏曰守  
三十日 族欲自立王者不親其子 客星若不時去  
人主有憂大臣有誅期不出年

客星犯張五

孝經章句曰黃星出張中君且獵黑星就之君死 石  
氏曰有星入張有賜客之事出張軍使賜諸侯 又曰  
入張國治宗廟期二十日國有憂男子有急 巫咸曰  
客星入張人遷徙天下變更令糴貴 郗萌曰客星入  
張諸侯有來賜吾君近臣者出張賜諸臣 荊州曰客  
星入張政急人民苦死邊 春秋圖曰客星出張白衣  
同姓有自立者天下更令有徙人若使人於諸侯 郗  
萌曰客星出入張兵起期百八十日一曰天子改政令

客星舍張留不去前將軍謀有陰兵起 黃帝曰客  
星守張天下人遠去一曰人有千里之行 孝經章句

曰客星守張在其中糴石三百遊在其旁石百有急令  
石氏曰客星守張楚周有隱士 海中占客星守張

不去滿三十日有亡國死亡臣殺其主小人謀貴禍及  
嗣子期三年 却萌曰客星守張小人有欺君者禍及  
嗣子 又曰先起兵者利後起兵者不利一曰食中有  
毒隣國有來獻食物者天子酒大出天子以為憂敗一

曰客有憂又曰弓大貴一曰糴大貴一曰粟貴一曰人  
憂食國大饑 玉厯曰客星守張邑多變在外 南官  
候曰客星守張五穀貴有賜之事 甘氏曰客星出張  
若守之白衣同姓自立者 郝萌曰客星入若守張有  
亡國死王又曰相憂一曰相大疾 陳卓曰客星犯守  
張天子以酒為憂

客星犯翼六

荊州占曰客星干犯翼國有用兵大臣有憂遠百八十

日 孝經章句曰蒼星出翼五穀風彫 石氏曰有星  
出翼使人於負海之國有星入翼負海客有來使者皆  
以烏為幣色黃白無故青道病黑死不至 巫咸曰客  
星出翼將軍謀反兵大起必有戰邊有大急同姓諸侯  
有自立者若大水五穀傷人民饑去其鄉期三年 百  
二十占曰他星出翼倍海國有受賜者 郝萌曰客星  
出入翼多風雨河決水且至道路不通 一曰五穀不成  
人多流亡 孝經章句曰客星守翼人多流亡水且至

道塗不通兵大起 石氏曰客星守翼君弱臣強四夷

王 却萌曰客星守翼將軍謀反兵大起一日國更其  
服又曰有大令若邊有大急一日有一國之戰一日名  
山有崩者一日五穀雨傷一日歲大風大水一日有大  
令 荊州曰客星守翼歲大饑 南官候曰客星守翼  
有自立者同姓王侯必有權臣 客星明大守翼大水  
江河決溢道路不通魚龍遊於陸道 客星守翼羽毛  
旗幟貴

客星犯軫七

海中占客星干犯軫近期百八十日遠期一年黃帝  
曰赤星入軫輕車入出軫輕車出石氏曰有星入軫  
諸侯有來使者以車為幣出軫君使人之諸侯皆車為  
幣 郊萌曰客星入軫有土功若五穀大貴 百二十  
占曰他星入軫有使者以車為幣貴人多繫者一曰無  
處車繫馬或曰野無車馬 文耀鉤曰客星出軫若有  
白衣自立者大國多害若有喪兵革起天下有逃主近

期不出一年遠三年 荊州曰赤星出軫軍出 百二十占曰他星出軫有使者以車馬為幣以冬三月視軫中 黃帝曰赤星守軫車馬有急行 客星守軫車馬貴 石氏曰客星守軫川谷不通而車貴 一曰守軫轄若長沙車官使有憂 甘氏曰客星守軫國有自立者大國多害 却萌曰有星守軫為車事 客星守軫兵大起邊境尤甚 一曰名山有崩者 一曰若白黃有外憂蒼為臣 一曰赤黃外憂黑蒼讒臣 一曰有土功之事

一曰五穀大貴 石氏曰客星犯守軫天下有山崩若  
水溢出之地中 郝萌曰客星入長沙天下無處士一  
曰天下有逃王 一曰兵盡散出之

唐開元占經卷八十一